

I SIGNALI DI CUMUNICAZIONI LONGU À U TEMPU

Situazioni di scrochju

À pena di Storia

À u 16^{mu} seculu, a minaccia barbaresca era trimenda pà i Corsi. I pirati, ghjunti cù i batteddi, assaltavani a Corsica è abbuttavani i paesi, purtendu si prighjuneri da fà ni schiavi. Da pruteghja si, funi custruiti un centu di torri longu à u rinaghju. In drentu, ci stavani trà 3 è 5 omi, i turrigiani, à quali tuccava à curà u mari notti è ghjornu è à privena a pupulazioni s'eddi vidiani batteddi chì s'avvicinavani. A torra di a Parata, alzata in u 1550, hè una di sti torri genuvesi.



Duc 1 : l'isuli Sanguinari

Scopi pidagogichi

In fin di ciculu s'aspetta :

- Idintificà un signali è un'infurmazioni.

Cumpitenzi travagliati :

- praticà dimarchji scentifichi è tecnulogichi ;
- praticà linguaghji ;
- situà si in u spaziu è in u tempu.

Cunsegni

Cù l'aiutu di i documenti,

- rializà un frisgiu crunologicu cù à nantu l'affaccata di i sfarenti attrazzi di cumunicazioni di u situ I Sanguinari - A Parata.
- rializà un tavuleddu di 3 culonni chì permetti di ligà ogni **attrazzu di cumunicazioni** à un **signali** è un'infurmazioni.




Matiriali



Documenti da sfruttà

DUCUMENTU 2 - Carta di i torri genuvesi in Corsica



I SIGNALI DI CUMUNICAZIONI LONGU À U TEMPU

DUCUMENTU 3 : sicondu a pagina wikipedia «Tour génoise»

Funzioni : A guarnigioni di una torra era cumposta da dui à sei omi (i turrisciani), ricrutati frà i paisani è pagati cù i tassi lucali. I turrisciani ci vulia ch'eddi stessini tuttu u tempu in a torra. Ni pudiani escia dui ghjorni à u massimu, da fà a pruvista è pà a paga, è solu à l'unu à l'unu. Faciani da sintinedda cù i fochi è i segnali regulamintari : cuddavani mani è sera in cim'à a torra, rinsignavani i navigatori, i pastori è i lavuradori in quant'à a sicurezza, faciani fochi da cumunicà cù i torri più vicini, cullucati cù ghjudiziu à purtata d'ochju, è faciani casu ch'eddi ùn ghjugnissini i pirati. In casu d'allarma, era u signali datu da a cima di a torra, fumi, focu o son di culombu (una conca marina) ch'eddu fussi, à privena u circundaghju ch'eddu s'avvicinava un batteddu nimicu. Tandù, ghjenti è animali si ni scappavani à l'internu. I dui torri più vicini s'accindiani, è tira avanti è tocca, fin tantu ch'è tutta a Corsica fussi à capu di u priculu, veni à dì in pochi ori.



Duc 3.1 : conca marina, chjamata dinò «culombu».



Duc 3.2 : Zampaglinu, capimachja corsu di u 18^{mu} seculu, sunendu u culombu.

DUCUMENTU 4 - Un'antica torra genuvesi turrata fanali : u fanali di i Sanguinari



In u 1838, d'aprili, a Cummissioni di i fanali di u ministeriu di i Travagli Publichi dicisi di cullucà cinque fanali longu à u rinaghju di a Corsica, pà a sicurezza di i batteddi à vapori. U prima l'alzetini à nant'à l'isula maiò di i Sanguinari. I travagli durentini sei anni. Lampa un signali luminosu da annuncià l'intrata in u portu d'Aiacciu.

A so basa hè fatta com'è una furtezza è ramenta a torra genuvesi ch'è ci era prima, ch'è si chjamava «Sanguinara di mari». Erani trè guardiani à travaglià in u fanali, fin ch'eddu diventessi automatizatu, in u 1985.

I SIGNALI DI CUMUNICAZIONI LONGU À U TEMPU

DUCUMENTU 5 - U telègraffu di Chappe

In cima di a torra genuvesi di a Parata, ci hè sempri a vistiga di un telègraffu di Chappe. Era statu inauguratu in u 1794 è ghjuvava da cumunicà cù l'isula di Mezumari è cù i batteddi. À nant'à i «torri di Chappe», ci era un maghju mobuli chì si vidia à una dicina di chilometri è chì dava parechji infurmazioni à distanza. U bracciu principali u chjamavani «u rigulatori» è i dui ali neri «l'indicatori». Ad ogni forma giometrica fatta da u rigulatori è l'indicatori, currispundia un signali. È ogni signali currispundia à un'infurmazioni pricisa cudificata.

DUCUMENTU 6 - U simàfuru di a Parata



A parodda simàfuru veni da u grecu anzianu SEMA , **segnu** è PHOROS **chì porta**, vali à dì **purtà un segnu**. Un prima simàfuru fù criatu à nant'à l'isula di Mezumari da Napulioni III, in u 1865, po u spiazzetini à a Parata in u 1955. Hè a prupietà di a Marina Naziunali ed hè un puntu d'usservazioni da permetta anzi tuttu, sicondu à Yves Joly, u prifettu marittimu, cumandanti di a zona Mediterraniu «di curà l'attività marittimi è di cuntribui cusì à a difesa di u tarritoriu è di palisà l'anumalii. Cuntribueghja dinò à sicurizà a navigazioni, à salvà viti in mari, à luttà contr'à i fochi in Corsica.»

Da riempia sti missioni, u parsunali di u simàfuru (l'agguattadori) travaglia in una *camara di veglia* cù finestroni larghi, di cannuchjali putenti è dinò di un radar è di mezi di cumunicazioni. Guattani i signali di priculu (canali 16 in VHF) mandati da i batteddi da ammintà un scundesu o un affundamentu imminenti. S'eddu ci hè bisognu, i signali sò trasmissi à u CROSSMED (succorsi in mari).

In u 2015, fù impignatu u simàfuru in 16 uparazioni di succorsu o d'assistenza in mari, è aiutò à assista 51 parsoni.

I SIGNALI DI CUMUNICAZIONI LONGU À U TEMPU

> AIUTU DA A DIMARCHJA DI RISULUZIONI

Da traccià u frisgiu crunologicu :

- metta u fogliu in u furmatu «paisaghju» ;
- traccià una ligna di 25 cm ;
- à u principiu di a ligna, scriva 1500 è à u cm 20 scriva 2000 (2 cm = 50 anni) ;
- numarà l'anni ogni 2 cm (1550, 1600, 1650 ...) ;
- truvà in i documenti l'anni chì currispondini à i custruzzioni è i mudernizazioni di l'opari ;
- situà st'anni à nant'à u frisgiu ;
- pricisà à chì currispondi ogni annu ;
- aghjugna culori è illustrazioni da imbiddiscia u travagliu.

- [Cliccà da veda un esempiu di frisgiu crunologicu.](#)

Cumplittà stu tavuleddu :

Attrazzu di cumunicazioni	Signalu mandatu o ricevutu	Infurmazioni purtata da u signalu
Torra genuvesi		
	Lumi	
		Missaghju cudificatu

DA ANDÀ PIÙ LUNTANU

Saveriu è i Turchi

<https://www.youtube.com/watch?v=AktHHJG7T04>


<https://www.educorsica.fr/index.php/videos/207-saveriu-e-i-turchi>

Les lettres de mon moulin

https://fr.m.wikisource.org/wiki/Lettres_de_mon_moulin/Le_phare_des_Sanguinaires

Un riportu di RCFM quand'eddu fù mudernizatu u simàfuru in u 2016


<https://www.francebleu.fr/infos/societe/le-semaphore-de-la-parata-sentinelle-du-littoral-sud-corse-1458238728>



I SIGNALI DI CUMUNICAZIONI LONGU À U TEMPU

> AIUTU DA A DIMARCHJA DI RISULUZIONI

Esempiu di frisgiu crunologicu (aiutu da a dimarchja di risoluzioni) :



I SIGNALI DI CUMUNICAZIONI LONGU À U TEMPU

>DA TENA À MENTI

1. Sò numarosi i mezi di cumunicazioni è ci hè statu un'ivuluzioni longu à u tempu.
2. Par ogni situazioni ci hè un signali (sonu, lumi, ecc.) chì trasmetti un'infurmazioni pricisa (allarma, missaghju...).

